





Motinom:	
·	
Mo sirnom	•







Panel Redaksion Kreol Morisien

Manb panel

MAURITIUS INSTITUTE OF EDUCATION

Daniella Bastien - Kordonater, Lecturer

Dr (Mrs.) Nita Rughoonundun-Chellapermal - Asistan kordonater, Associate professor

Profeser lekol primer

Ahad Mungralie

Selvavadee Pakkiri

Jean-Noël Jolicoeur (Rodrig)

REMERSIMAN

Christianna Perrine

MIZ-AN-PAZ

KOLA

Ilistrasion (Paz 2, 8, 10, 13, 16 ek 18) Created by - Freepik.com

ISBN: 978-99949-44-43-9


Copyright Mauritius Institute of Education (2021)

This publication is carried out on a strictly non-profit making basis and is meant to be distributed freely to students and educators by the Ministry of Education and Human Resources, Tertiary Education and Scientific Research

It is strictly prohibited to reproduce this material or use it for any other motive, unless the permission of the MIE and the Ministry of Education and HR, TE & SR is obtained in writing.

somer

SAPIT 4 BANN SANTIMAN EK LEMOSION P1-36	1
EVALIASION LEKTIR KONPREANSION P37 - 44	37
GRAMER P45 - 52	45
LORTOGRAF P53 - 58	53
LEKTIR P59 - 66	59
VOKABILER P67 - 70	67



Bann santiman ek lemosion

- Ekout ek konpran enn text ki an plizier parti
- Diferansie ant verb santiman, verb aksion ek verb ki exprim aksion mantal
- Servi verb ki exprim santiman, verb ki exprim aksion ek verb aksion mantal dan prodiksion ekri
- Servi enn vokabiler presi pou exprim santiman ek lemosion
- Servi bann expresion an Kreol Morisien
- Reper erer lozik dan enn group mo, enn fraz ou enn text
- Servi ponktiasion avek pertinans
- Servi enn vokabiler ris pou ekrir enn deskripsion
- Lir varyete Kreol ki koze dan Rodrig

Konpreansion oditif



Finn ariv dernie term lekol. Bann zelev paret bien fatige. Zot tou pe per lexame PSAC ki pe vini . Zis sa mo-la fer zot gagn enn lespes trak, enn zafer ki trap vant, korde. Misie Kevin dir ki li normal resanti enn lafreyer kan pans sa lexame-la. Se parski se enn evennman inportan lor ki pou ziz tou zot parkour dan primer.

Me Misie Kevin ousi dir ki zot bizin konbat sa lafreyer-la. Zot tou finn bien serye toutlong lane ek mem depi First; zot bizin aprann fer zotmem konfians ek pa les sa lemosion negatif la afebli zot kapasite ek dekouraz zot. Li oule zot apresie zot bann dernie mwa ansam e ki zot prepar zot lexame avek konfians ek serenite. Ala so bann dernie mo: "Mo konn zot kapasite ek mo ena foul konfians dan sakenn isi!"

Bann parol Misie Kevin finn fer tou zelev rekinke. Zot nepli trakase. O-kontrer enn lafors monte dan zot ek zot figir ek zot regar eklere. Sakenn santi li kouma enn sanpion ki pe al ver enn viktwar.

KESTION

- 1. Ki moman lane finn arive pou bann zelev?
- 2. Ki levennman bann zelev pe redoute?
- 3. Eski Misie Kevin kriy ar so bann zelev akoz sa?
- 4. Ki Misie Kevin fer?
- 5. Ki lefe sa fer lor so bann zelev?

Misie Kevin paret satisfe. Li anonse ki li finn amenn enn liv ki apel Nou Rises e dan ki ena zistwar personel sis zenn ki viv dan parti Les Moris. Ena de zistwar ki li anvi partaz avek zot.

"Zot pe rakont zot lavi?" Leo demande.

"Wi. Zot rakont sirtou ki bann zafer ki finn fer zot grandi. Ena bann bon lexperyans me ena ousi bann sitiasion difisil ki zot finn viv. Sa bann zistwar-la pou montre zot ki dan lavi, nou ena bann moman ki fer nou viv diferan lemosion kouman lazwa, latristes, laper ou lakoler," Misie Kevin reponn.

Li kontinie, "Nou pou departaz sak zistwar pou ki sakenn dan klas kapav lir a ot-vwa. Sak zelev pou lir enn paragraf e kouma li fini, li pou pas liv-la so vwazin. Pa bliye, li bon ki zot pran dis ou kinz segonn pou get parti ki zot pou lir avan zot koumans zot lektir a ot-vwa."

"Nou pou koumans avek zistwar Deny. Se enn garson ki mo sir zot pou apresie!"

Premie zelev koumans lir...



(ESTION ORAL

- 1. Kot Misie Kevin finn pran bann zistwar ki li anvi fer so bann zelev lir?
- 2. Ki sann-la so zistwar bann zelev pou koumans lir?
- 3. Ki manier Misie Kevin fer pou ki tou zelev tann zistwar-la?

Mo'nn dekouver ki mo ena enn pasion: desine.

Mo ti pou kontan desinn bann vag ki pe vinn kraz brit-brit kont bann ros nwar lor enn zil...

Parfwa mo al lapes dan lagon avek bann kamwad pre ar enn lil; so nom mo nepli rapel. San ki nou rann nou kont, nou deles bor laplaz pou nou al lwin dan lagon.

Kan lokazion prezante aswar, zame mo fatige admir bann zimaz feerik ki mo trouve kan mo get deryer, kote laplaz lwin laba, mo trouv bann lalimier lotel St Géran: ble, rouz ek blan. Zot paret pe detas zot ek pe naze lor so bann vag, koumadir bann girland Nwel lor fon enn tapi zetwal.

(ESTION ORAL

- 1. Ki Deny kontan plis ki tou?
- 2. Ki li ti pou kontan desine?
- 3. Ki li parfwa fer avek bann kamarad?
- 4. Kouma li dekrir lalimier lotel?
- 5. Eski li fatige get sa bann lalimier-la?

Parfwa, kan nou pa ti pe atann, sa bann pwin lalimier briyan la repann zotmem kouma enn bouke kas-lizie e zot al zwenn bann zetwal lao dan lesiel. Zot pa paret afekte par grander bann montagn nwar ki ena par deryer. Depi kot nou ete dan lagon, nou tann explozion bann fedartifis ki pe desir silans nou lanwit avek enn tapaz mat...

Parfwa, kler-de-linn permet nou fer diferans ant bann diferan kouler pwason ki dormi trankil dan dilo kler lagon, kot nou pe traverse. Nou kontan kont zot. Bann zegwi nwar ek rouz bann oursin drese kan nou lipie frol ar zot.

Inn deza arive kot enn sel kou, nou trouv bann lalimier St Géran plonz dan dilo lagon. Lerla, manto lanwit anvlop nou e nou realize ki lalimier bann zetwal pa ase pou montre nou sime pou retourn lakaz.

E kan sa koupir kouran ki rann nou aveg la arive, nou oblize retras nou sime. Dernie ler, nou res zis son bann vag ki pe kraze avek laraz, lwin, kont ros bann zil, ki servi nou kouma gid.

KESTION

- 1. Ki spektak Deny ek so bann kamarad trouve parfwa depi lwin dan lagon?
- 2. Ki zot tande lerla?
- 3. Ki ekler bann pwason parfwa?
- 4. Ki arive kan tou lalimier lotel tengn?
- 5. Ki manier zot diriz zot pou retourn ater lerla?



AKTIVITE KONPREANSION

1. Mo reponn par *vr*e (V) ou *fos* (F).

a. b.	Lane lekol pre pou fini. Bann zelev pe atann lexame avek exsitasion.	
C.	Misie Kevin so bann parol	
_1	redonn so bann zelev konfians.	
d.	Tou zelev pou gagn lokazion lir a ot-vwa.	Ш
e.	Deny ek so bann kamarad	
f.	abitie al lwin dan lagon volonterman. Deny ena enn pasion pou lapes.	
g.	Deny ek so bann kamarad	
g.	parfwa al lapes lwin andeor lagon.	
h.	Deny kontan admir bann zoli kiksoz.	
i.	Deny finn vinn aveg apre enn aksidan elektrik.	
•	Deny min time aveg apre em anelaan eleman	
2. N	lo reponn bann kestion dan mo kaye.	
a.	Ki lefe lexame ena lor bann zelev?	
b.	Eski Misie Kevin kriy ar so bann zelev	
	parski zot pe per? Ki manier li reazir?	
C.	Ki montre ki bann zelev ena	
	konfians dan zot profeser?	
d.	Eski to panse ki Misie Kevin	
	enn bon profeser oubien non? Explike kifer.	
e.	"Nou pou koumans avek zistwar Deny.	
	Se enn garson ki mo sir zot pou apresie!"	
	Ki sann-la pe koze isi?	
f.	Eski lavi bann zenes dan liv "Nou rises" fasil,	_
	kot tou an-roz? Ki fraz depi dan pasaz dir sa?	
g.	Ki premie fraz ki premie zelev koumans lir?	
h.	Ki Deny ti anvi desine?	
İ.	"Nou kontan kont zot" Ki "zot" reprezante isi?	
j.	Donn omwin de zimaz ki Deny servi pou	
	dekrir seki li tande ou trouve. Ki zot dir twa	
	lor Deny? Ki kalite garson li ete?	

Konpreassion oditif

- 3. Mo rod otan mo ou expresion ki mo kapav pou ranplas sa bann mo ek expresion-la dan pasaz. Zot pa neseser bann sinonim exakt me zot bizin al bien dan pasaz-la.
- a. fatige
- b. lafreyer
- c. lazwa
- d. departaz
- e. brit-brit
- f. deles
- g. kas lizie
- h. servi nou kouma gid
- 4. Mo explik bann mo ek group mo dapre pasaz.
- a. pasion
- b. feerik
- c. enn lespes trak
- d. enn zafer ki trap vant, korde
- e. sitiasion difisil
- f. desir silans nou lanwit
- 5. Mo rod kontrer bann mo ki finn done dan pasaz.

piblik	
fasil	
an-silans	
deteste	



Bann verb santiman

Mo dekouver bann verb ki exprim enn santiman

Bann zelev pe per lexame PSAC.

Zot bizin aprann <u>fer</u> zotmem <u>konfians</u> ek pa les sa lemosion negatif la <u>dekouraz</u> zot.

Li oule zot apresie zot bann dernie mwa ansam.

"Mo konn zot kapasite ek mo ena foul konfians dan sakenn isi!"

Bann parol Misie Kevin finn fer tou zelev <u>rekinke</u>. Zot nepli trakase.

Observ bann verb ki finn <u>souligne</u> dan bann fraz lao. Ki zot exprime, enn aksion ou enn santiman?

Ki ete enn verb santiman?

Se enn verb ki exprim enn santiman ou enn lemosion ki kikenn resanti, par exanp lazwa, latristes, laper, lakoler, lazalouzi, etc.

Sey trouve, pou sak verb ki finn souligne lao, ki santiman ou lemosion li exprime.

Par exanp, "pe per" exprim enn santiman laper ou linkietid.

Ala lezot exanp verb santiman: santi, resanti, riye, plore, kontan, sagrin, ankoler, deteste, depler, ankouraze, etone, agase, etc.

Aster, get sa bann fraz-la:

- Zis sa mo lexame la fer bann zelev <u>gagn enn lespes trak</u>, enn zafer ki <u>trap vant, korde</u>.
- Zot <u>santi enn lafors monte dan zot</u> ek <u>zot figir ek zot regar eklere.</u>
- Sakenn <u>santi</u> li <u>kouma enn sanpion</u> ki pe al ver enn viktwar.

Isi, se sak fwa **enn expresion net** ki exprim bann santiman ou lemosion:

Dan 1e fraz, bann expresion-la exprim enn santiman laper, enn laper ki fer panike ek malad.

Dan 2e ek 3e fraz, bann expresion tradir enn santiman retour konfians; bann zelev rasire.

Ki mo bizin retenir?

Parmi bann verb – ki bien boukou –, ena serten ki exprim bann santiman ou bann lemosion. Apel zot bann verb santiman.



Mo antrene

- 1. Mo relir zistwar Deny ek mo reper de verb santiman.
- 2. Mo refer mem kiksoz ek mo reper de nom ki exprim enn santiman.
- 3. Mo anserkle bann verb ki exprim enn santiman.

naze	tonbe	gete	apresie	dezire
admire	kontan	efreye	ekrir	marse
per	riye	pardone	deteste	adore
perdi	degoute	aranze	meprize	irle

4. Mo swazir trwa verb santiman depi dan lalis kestion 3 ek mo ekrir enn fraz avek sakenn.




5. Mo swazir enn verb depi lalis ki finn done anba pou konplet sak fraz.

tranble, deteste, riye, regrete, nerve, prefere, agase

a.	Sandrine pe get enn fim komik ek sak fwa li get akter-la fer enn grimas, li mor ar
b.	Remy kouma enn fey kan li trouv tig-la sot baraz fons lor zot loto.
C.	Aret koumsa, taler to tom malad!
d.	Bann zwer sa larbit-la parski li donn kart rouz brit-brit.
e.	Mo mo finn kriy ar twa pou nanye.
f.	Kouman mo papa trouv enn fot dan mo devwar, li
g.	Mo gran kouzin finn vinn konze Moris. Aster li





Bann mo ki exprim bann santiman

Nou finn deza get bann verb santiman. Me pa zis verb ki kapav exprim enn santiman ou enn lemosion.

Observ par exanp sa bann fraz-la:

- Misie Kevin dir ki li normal resanti enn lafreyer kan pans sa lexame-la.
- Li ousi dir ki zot bizin prepar zot lexame avek konfians ek serenite.

Isi, se bann **nom** ki exprim bann santiman, pa vre?

Ala de-trwa lezot nom ki exprim bann santiman ou lemosion: lakoler, laraz, lapenn, langwas, kontantman, boner, sirpriz, exsitasion, etonnman, etc.

Observ anfin sa de fraz-la:

- Bann zelev bien fatige.
- Misie Kevin satisfe.

Isi, ki sa bann mo ki tradir enn santiman la? Se de **azektif**.

Ala de-trwa lezot azektif ki exprim bann santiman ou lemosion: ankoler, araze, zalou, ere, malere, mizerab, ge, souriyan, exsitan, exsite, inkie, fier, etc.

Ki mo bizin retenir?

Pou exprim enn santiman ou enn lemosion, kouma lazwa, nou kapav servi:

- **)** bann verb, ex: riye, amize
- bann nom, ex: lagete, lazwa
- bann azektif, ex: ere

Anplis, nou kapav servi bann expresion an plizier mo.



1. Dan sak lalinn, koup mo ki pa exprim enn santiman

- a. tandres swiv laenn satisfaksion
- b. ere zalou rapid strese
- c. kontan panike regrete manze
- d. douler tapaz detres lasagrin
- e. azil zwaye tris ankoler

2. Dan sak lalinn, koup mo ki pa al avek lezot.

- a. plore larm koler tristes
- b. lafeksion lamour lamitie laraz
- c. panike terorize tranble repoze
- d. sagrin lazwa melankoli dezespwar

3. Klas bann nom anba dan kolonn ki bizin.

Santiman agreab	Santiman dezagreab

sirpriz	tristes	lakoler	langwas	boner
zalouzi	laont	lazwa	linpasians	freyer
desepsion	enervman	etonnman	laper	



4. Lir zistwar anba la ek reper bann mo ek expresion ki tradir

- a. tristes Sandra
- b. boner ek exsitasion bann dimounn dan lari
- koler sofer loto
- d. santiman konfizion Sandra kan sofer frene ek kriye
- e. ek klas zot selon ki zot bann verb, nom, azektif ou expresion.

Nwel dan mwins ki enn semenn

Nwel dan mwins ki enn semenn me Sandra pa santi okenn lazwa dan so leker.

Depi sa zour kot so papa finn bizin admet lopital, Sandra pa pe viv. Li tranble sak fwa telefonn sone. So lestoma amare; li nepli anvi get televizion ou zwe bann "game". Li mem nepli al lor Facebook pou met nouvo foto ek dialog ar so bann kamarad. So leker lour; a tou moman li santi enn tristes monte ek nway li net. Parfwa, li zet li lor so lili ek li plore forfor dan so lorye.

Toule zour, li al rann so papa vizit dan lopital. Dan lari, ena boukou dimounn pe promne. Bann zanfan zot lizie briye, zot souriyan ek zot koz for-for pou demann enn kado ki zot finn admire dan enn vitrinn. Zot paran ousi paret ere net.

Sandra gagn linpresion ki zot pa viv dan mem lemond. Li, li telman dezespere ek tou sa bann dimounn otour li la ki telman exsite pou prepar Nwel ...

"E, pa get ou sime kan ou marse?" enn lavwa kriye. Sandra sezi, alor ki enn loto frenn sek.

5. Repran bann mo ki to finn trouve pou kestion 4 ek ankadre

- a. bann verb an rouz
- b. bann nom an **nwar**
- c. bann azektif an ver
- d. santiman konfizion Sandra kan sofer frene ek kriye an ble
- e. ek klas zot selon ki zot bann verb, nom, azektif ou bann expresion.

6. Ekrir enn fraz ki sak personaz kapav pe dir.





Anou zwe...

7. Mo rod bann mo ki exprim bann lemosion ou santiman dan sa grid-la.

X	\mathbf{Z}	N	S	R	Α	I	0	P	P	E	C	Z	Ε	E	N	E	R	V	E
Q	H	N	A	0	F	R	Z	В	T	Q	I	I	I	I	I	N	K	I	E
N	F	F	K	I	K	G	R	E	E	S	A	G	A	N	U	G	Α	0	N
Μ	I	K	V	0	F	E	В	P	E	M	L	A	K	S	S	P	J	N	0
Η	Α	R	E	W	U	Ν		Y	T	I	X	F	T	0	I	I	K	T	I
S	I	N	G	Z	A	P	0	M	N	E	E	E	I	U	A	E	L	E	S
A	Ν	N	K	Α	I	J	A	K	Α	T	Z	N	N	S	P	Z	P	T	P
В	I	A	D	0	S	L	P	В	Μ	I	A	0	0	I	U	0	L	В	E
I	S	M	S	I	L	N	A	L	R	S	R	D	M	A	R	T	G	Z	S
E	Μ	I	I	E	F	E	W	R	U	X	U	N	R	N	E	V	L	F	E
Z	E	M	M	L	N	E	R	K	0	E	0	A	A	M	N	I	T	M	D
-		-	D	I	I	0	R	Z	T	M	K	В	E	F	0	L	A	E	L
I	\mathbf{z}	I	R	Τ.	_	0	11	4	_	1.1	11	ב	ш	_	0	П	A	_	
L	A	A	T	R		E	K	A		M	E			Q	В	N	N	F	A
									G									100	A R
L	A	A	T	R	S	E	K	A	G N	M	E	A	K O	Q	В	N	N	100	
L G	A	A U	T R	R O	S	E E	K R	A E	G N R	M I J	E D	A D	K O	Q B	B E	N E	N D	F	R
L G E	A L U	A U Z	T R I	R O W	S H C M	E E K	K R P E	A E A	G N R	M I J A	E D Z R	A D V	K O N B	Q B S	B E V	N E R	N D R	F I A	R S
L G E N	A L U O	A U Z K	T R I S	R O W E	S H C M	E E K R	K R P E	A E A F	G N R	M I J A	E D Z R	A D V W	K O N B	Q B S E	B E V C	N E R A	N D R E	F I A N R	R S E
L G E N O	A U O S	A U Z K P	T R I S Q	R O W E J	S H C M G	E E K R E	K R P E L	A E A F Y	G N R N Q	M I J A	E D Z R	A D V W J	K O N B L	Q B S E H	B E V C S	N E R A	N D R E	F I A N R	R S E L

ere	soulaze
ankoler	agase
tris	ranferme
koupab	boner
enerve	konsterne
anbete	egri
kalm	inkie
demoralize	konble

optimis rekonesans vilnerab desepsion mosad insousian tourmante deprime fier dekouraze imilie mefian armoni pesimis sagrin konfian neglize onte indiferan tandres zwaye

lontograf

ERER LOZIK

1. Mo reper bann group mo kot ena erer lozik.

- a. lapat pwason
- b. kouran finn koupe
- c. aroz kreson
- d. enn vieyar santener
- e. enn bisiklet rouz an oxizenn
- f. fer tapaz an silans
- g. lank kreyon laminn
- h. niaz finn perdi konesans
- i. ekrir enn zistwar
- j. enn liv zwanion
- k. disik-la pwavre
- disik-la bien fad

2. Mo reper erer lozik dan sak fraz. Apre mo koriz zot.

- a. Samuel finn al patisri pou aste so bann liv lekol.
- b. Kouma robo vinn rouz, Gregory akselere ek zot kontign so larout.
- c. Sarah pe rod enn mouswar pou li al bengne.
- d. Kari-la pena gou; finn bien met tou zepis ki bizin.
- e. Bernard pe dezabiye pou li al travay.

3. Mo koriz bann erer lozik ki souligne dan sa text-la pou rann li koeran.

Enn zour Alan ti pe gagn enn move douler ledan. Telman douler-la ti vinn atros, li finn bizin al kot enn dermatolog. Laba, dan lasal datant, ti ena de-trwa zwazo. Sakenn ti pe atann so tour pou swazir. Laplipar ti pe paret dan exsitasion. Mo gagn riye kan mo get tousala. Finalman finn ariv mo tour pou sove. Lapolis-la dir mwa ki mo molar finn pike. Deswit li pran enn masinn pou anlev parti ki sin la ek li finn met enn plonbaz dan zorey-la. Mo finn donn li randevou dan enn siek.

4. Mo reper bann erer lozik dan text-la. Apre, mo modifie li pou rann li koeran.

Azim pe promne dan montagn e li pe soufle enn zoli ler. Li pe apiy lor enn brin lerb pou li mars pli vit e san tro fatige. Peizaz devan li manifik e soley ti pre pou leve. Kan li finn ariv lao, Azim arete, asiz lor enn ros ek tir enn dipin ek enn boutey zi depi dan so loto. Kan li finn perdi inpe lafors, li swazir enn poz pou li pliy so latant ek instal li pou lanwit. Tigit-tigit, enn silans tom lor lavil ek Azim gagn somey, berse par ronron vantilater.



DESKRIPSION (1)

Dekrir enn dimounn

Nou kapav dekrir enn dimounn dan enn fraz ou plizier fraz.

Ena diferan sitiasion kot kapav bizin dekrir enn dimounn.

Ex: dekrir enn sispe dan stasion lapolis; koz lor enn dimounn ki finn desede dan enn lamor; koz lor bann nouvo marye dan enn diskour maryaz; dekrir personaz prinsipal dan enn zistwar, etc.

Exanp:

- pou enn depozision lapolis, bizin donn bann detay presi ek osi konple ki posib, kouman: enn misie, madam ou zanfan; so laparans fizik (laz, groser, kouler, longer, seve, figir, kik sign spesial lor so figir (mark, tatwaz); so labiyman, etc.
- kapav ousi enn deskripsion ki enn personaz fer de enn lot personaz ar so bos dan enn zistwar polisie, detektiv ou kriminel, etc.

Misie-la ti bien brin ek li ti paret dan latrantenn. Li ti long, bien long, kapav enn met katrovin parla ek li ti bien kosto ousi, koumadir li fer miskilasion. Li ti ena seve kourt, inpe boukle. Li ti ena enn ti labarb ousi, zis lor so manton; li pa ti ena moustas selman.

Li ti met enn rebann, enn jaket nwar, enn jinn ble; mo krwar li ti ena bot an kwir, kapav kouler nwar, me mo pa sir. So jaket ti ouver; li ti ena enn t-shirt ver andan. Lor t-shirt-la ti ekrir "Barakouda". Li ti ena enn gro bag an-arzan dan so lindex drwat ek enn bel mont kouler nwar dan so pwagne gos. Ti ena enn lasenn epe an-or, san meday, ki ti o-ra so likou.

pou enn deskripsion rapid dan enn zistwar.

Enn zenn mamzel frel-frel ti pe travay lor enn komputer.

dan enn lamor, pou koz lor dimounn ki finn desede la. Kapav koz sirtou lor karakter ek bann manier dimounn-la

Sa ki ti enn bon dimounn sa! Li ti travay lopital, non? Tou dimounn li ti pe ede!

Apre tou dimounn rapel so riye. Depi de lwin, ou fini rekonet so lavwa; li ti touzour zwaye. Mem si li finn ale, nou pou touzour rapel li ge!









swa dekrir enn sanzman dan laparans ou konportman dimounn-la

Dernie ler, kan li finn tom malad la, li finn bien deperi. So lapeti ti finn bien diminie. Li ti nepli kontan sorti, al kot fami. Li'nn aret travay dan so zardin ousi. Li ti res dan so lasam, lor fotey, laplipar letan.

pou koz lor nouvo marye dan enn diskour maryaz

Robin enn exper kontab; li abitie travay lor bann sif, bann gro sif. Li kontan kapav aste tou seki li kontan san get pri, ek li pa prese. Li atann, li swazir bien. Ek parey kouman so bann kont bizin balanse bien ek a zour, parey li kontan tou kiksoz dan lord ek bien fer.

Nou ti pe koumans trakase li pa pou marye. Lane ale, lane vini, Robin pa paret interese ar personn.

Me kouman Beatrice finn paret lor map, Robin finn rekonet enn perl rar...

- 1. Mo swazir de personaz dan mo liv Kreol Morisien ek mo ekrir enn paragraf lor sakenn.
- a. Vanessa b. Leo c. met dekol d. Misie Kevin
- 2. Dekrir enn marsan anbilan.
- 3. Apre lektir text lao, fer deskripsion Beatrice, avek ki Robin pe marye.
- 4. Mo dekrir enn dimounn dan mo lantouraz ou mo fami ki mo pa tro kontan.
- 5. Mo dekrir enn personaz dan enn kont de fe ki mo bien kone.
- 6. Mo dekrir mo mama swa mo papa lor zot foto swa video maryaz.
- 7. Mo dekrir enn profeser ki mo finn apresie pandan sis lane ki mo finn pase dan lekol primer.
- 8. Mo dekrir enn dimounn bien ordiner ki mo kone ou abitie trouve.



LUCKY (1)

"Mo ti pou bien kontan res pre ar lamer," Vanessa dir ar Leo lor semin lekol.

"Mwa ousi," Leo reponn e li kontinie, "Depi ki mo finn tann zistwar Deny, mo anvi al lapes aswar, get bann zetwal par milie dan lesiel."

"Eee! Aret reve Leo! Nou bizin fer vit la. Laklos pre pou sone!" Vanessa dir. Misie Kevin atann ki tou zelev asize pou ki li koumanse, "Azordi nou pou lir zistwar Durla. Se enn tifi ki fer boukou zafer e ki ti ena kikenn spesial dan so lavi. Nou pou fer parey kouma yer. Sakenn pou lir enn bout zistwar."



Mo bann pli vie souvenir koumanse kan mo ti res dan Lafrik, dan Botswana kot mo ti ete kan mo ti ena 2 an. Mo papa ti travay teknisien dan enn lizinn masinn-a-koud. Laba, nou ti souvan al promne e parfwa nou ti al kanpe dan bwa. Kan lizinn inn ferme, nou finn bizin kit pei. Mo ti ena 6 an lerla. Mo pa ti pe anvi retourn Moris.

Ler nou finn retourn Moris, mo tantinn inn konsey mo bann paran aste enn lakaz Poste de Flacq. Mo pa tro kontan sa landrwa-la, se enn bwat palab! Mo sipoze ki li parey kouma tou vilaz; kot bann dimounn vey to zafer, mem si to pa'nn demann zot nanye. Mo gran rev se kit Poste de Flacq e retourn Botswana avek tou mo fami.



ESTION

- 1. Ki sann-la ti pou kontan res pre ar lamer?
- 2. Kot Leo ek Vanessa pe ale?
- 3. Ki Misie Kevin finn prepare pou fer dan klas gramatin-la?
- 4. Dan ki pei fami Durla finn al reste kan Durla ti zanfan?
- 5. Kifer zot ti finn al res dan sa pei-la?
- 6. Komie tan zot finn res laba?
- 7. Kifer zot finn retourn Moris?
- 8. Dan Moris, kot zot reste?



Konpreamsion



Mo ena ousi enn lot rev. Mo ti'a kontan vinn enn stilis. Mo desinn bann linz depi mo tipti. Sa inn koumanse dan mo bann kaye lekol. Mo extra kontan lamod.

Enn lot kiksoz ki mo apresie, se mars-marse lor bor laplaz ek dan bann sime Poste de Flacq. Mo kapav marse enn lazourne!

Mo kontan lir, bann kont Grimm par exanp. Mo trouv zot komik e mo finn konn Grimm gras a Mis Colette. Dan enn bann kont Grimm ena, "Le Vaillant petit tailleur", ero prinsipal la touy set mous e bann dimounn krwar ki li finn touy set dimounn e zot koumans per li.

Enn lot zafer ki pasionn mwa se bann seri lor televizion. Mo get bann seri amerikin pli souvan. Zot bataz enn lot. Ena plis laksion, touletan ariv bann zafer soke net! Mo panse ki sa inn nouri enn lanvi al dan sa pei-la, pou mo trouv sa devan mwa. Par exanp vizit New York avek so bann bel-bel batiman.

Mo kontan pran mwa kont: makiye, bros mo seve, fer mwa zoli.

Azordi mo ena 16 an. Mo ti pou bien kontan aprann zwe piano ek lagitar pou akonpagn momem kan mo sante. Biensir, mo ti'a anvi vinn enn santez dan lotel. Mo kone ki mo bizin aprann ankor pou ariv lwin, mo ena volonte pou reisi dan lavi.

KESTION

- 1. Ki bann travay ki Durla ti pou kontan fer?
- 2. Ki kalite liv Durla kontan lir? Donn enn lexanp. Ki li kontan ladan?
- 3. Ki bann pastan Durla?
- 4. Ki pei Durla anvi vizite? Ki manier li finn devlop sa lanvi-la?
- 5. Ki laz Durla ena kan li pe rakont so zistwar?
- 6. Ki metie Durla pa mansione, me ki li ti pou fer bien?



AKTIVITE KONPREANSION

1. Mo reponn par <i>vr</i> e (V) ou <i>fos</i> (F).	
 d. Durla ek so lafami finn retourn Moris pa e. Durla prefer res Moris ki dan Botswana f. Durla pa finn al lekol letan li ti Lafrik; li p g. Durla pou al travay Lafrik kan li vinn gra h. Durla ena bann pastan sinp. i. Biento Mis Colette pou vinn travay dan j. Durla kontan get bann fim ek seri amer k. Durla ena lintansion fer tou zefor ki bizi 	ar Durla an antie. depi Botswana, samem li ti pe res laba. ar obligasion. ba konn lir. an. lekol Leo ek Vanessa. rikin lor televizion. n pou li realiz so bann rev.
2. Mo trouv enn sinonim pou sak mo ki fir	nn done anba.
a. kontan b. spesial c. sipoze c	d. bel-bel e. pasionn
3. Mo reper bann pronom personel dan pa bann kont Grimm" ek fini par "e zot kou	aragraf ki koumans par "Mo kontan lir, mans per li." e mo dir ki sakenn reprezante.
Pronom	Seki li reprezante
Мо	Durla
4. Mo reponn sak kestion dan mo kaye ap	
4. Wo report sak kestion dan mo kaye ap	re enn travay an-group.
a. Ki fraz dan pasaz montre ki Durla ank b. Ki ti pe fabrike dan lizinn kot papa Dur c. Ki de lwazir Durla ek so fami ti ena ka d. Ki manier bann paran Durla finn vinn e. Eski Durla kontan res Poste de Flacq f. Nomm enn kalite liv ki Durla kontan lin g. Kifer bann dimounn per ero "Le Vailla h. Kouma Durla okip limem? i. Eski Durla konn sante? Ki fraz dan pa	cor rapel pei so lanfans? rla ti pe travay? n zot ti Botswana? res dan Poste de Flacq? ? Kifer? r. nt petit tailleur"? asaz soutenir to repons? vinn enn zouvriye, enn teknisien, enn sportifeenn metie lamer? Ki fer twa dir sa?

a. souvenir b. lamod c. nouri enn lanvi d. volonte6. Mo swazir pou reponn enn kestion dan mo kaye.

- a. Eski twa ousi to ena bann rev kouma Durla? Rakont nou to rev dan enn paragraf.
- b. Eski to finn deza observ bann zetwal aswar? Ki lemosion to resanti?
- c. To res dan enn vilaz ou lavil? Donn bann lavantaz ek dezavantaz ki ena dan to landrwa. Dir kifer to kontan res laba ou kifer to pa kontan.
- d. Dekrir to liv prefere. Kifer to kontan sa liv-la?



Verb aksion

Anou fer enn pizza

Prepar lapat.

Met lafarinn dan enn gro bol ek azout lelvin ek disel. Melanz toule trwa bien.

Apre vid delo tied ek enn tigit delwil.

Petriy melanz-la ziska lapat-la bien mou.

Les lapat-la dan enn kwin pou li monte.

Fer lasos.

Dan enn graynder, kraz pomdamour, lay ek bann zepis dapre to gou.

- Belo lapat pou fer li vinn kouman enn farata; li bizin bien mins parski li pou monte kan kwi.
- Tal lasos lor lapat.
- Azout bann toping kouma sosis, poul frir, batonet krab rape, zanbon, rondel tomat, sanpiyon, brinzel frir, zoliv, etc.
- Rap fromaz bien lao (chedar, emantal swa mozarela.)
- Kwi dan four lor enn tanperatir 230° C pandan 10 minit.

Mo dekouver

- 1. Mo soulign bann lezot verb aksion dan "Reset pizza".
- 2. Mo konpar avek enn lot reset pou dir si tou reset kontenir boukou verb aksion. Eski zot kontenir sirtou bann verb aksion?
- 3. Mo konpar avek enn "Mod danplwa" ki explik ki manier pou fer enn instalasion pou dir si sa tip text-la kontenir boukou bann verb aksion. Eski zot kontenir sirtou bann verb aksion?

Ki ete enn verb?

Li konzige dapre mod (indikatif, infinitif, etc.) ek tan (prezan, pase, etc.). Dan enn fraz, li souvan ena enn size ki plase devan li ek ki souvan enn pronom personnel (mo, to, etc.)

Li exprim enn aksion, ou enn evennman, ou ankor enn leta, enn santiman swa enn lemosion.

Ki ete enn verb aksion?

Enn verb aksion refer zis a bann verb ki exprim enn aksion ou enn evennman. Zot deroule dan letan ek zot ena enn koumansman, enn "pandan" ek enn lafin laplipar letan.

Exanp: galoupe, sote, manze, ekrir, etc.





Mo antrene

4.	Mo idantif	ie bann ver	b aksion el	k mo ekrir zot dan mo kaye.
	kase apresie ekrir plante	penn korize koupe nerve	ranze resanble tipe deteste	explike
5.	Mo rod en	ın verb apro	priye pou	ranpli sak tire.
a. b. c. d. e.	Si to p Mo pe	oa e sa pa	bann bra _ tou bann ike biskwi la	poutrou. ans to pie leksi, li pa pou raporte bien lot lane. kiksoz initil dan mo lasam pou zete. a pou anpes li gagn ler. an-la tro sal!
6.		verb aksion nn lexanp p	•	o ki finn done.
a. b. c. d. e. f.	plante sekret profes ponpie	er — ser — ser —	, touse, obs	erve, tate, preskrir
				Anou zwe
7.	Rod enn v	erb aksion	pou sak de	efinision.
a. b. c. d. e. f.	bouz I resipia larg bo donn o tir linz	oulon → d detay pou fe → d	ritm lamizik ek konteni r konpran →	→ d pe tom deor → d • e • an kontak avek enn sirfas orizontal → a



1. Swazir enn santiman ou lemosion par fraz.

a.	Marc pa pe kiwar so lizie. Zame ii iinn trouv enn zaier parey. ()
b.	Sammy tap so lipie kont larmwar apre enn diskision. ()
C.	Anushka esey kriye me okenn son pa sorti. Li esey bouze me pa kapav, koumadir
	li finn paralize. ()
d.	Sa tifi-la enerv mwa. Sa fer enn semenn ki li finn rant lekol ek deza tou zelev pe
	tourn otour li. Me ki li ena plis ki mwa? ()
e.	Malgre tou so zefor, Anna pa finn reisi. Li nepli ena kouraz. ()
2. Noi	mm santiman ki sak senaryo indike.
a.	Mo gran frer finn gagn so permi kondir; li koumadir dan lezer!

- Zordi se dernie zour lekol avan konze; mo pa pe kapav res trankil lor mo sez, mo le b. ler al pli vit!
- Manisha fek aprann ki enn loto finn tap ar so lisien. Li koumans kriye ek plore. C.

3. Mo transform bann azektif an nom.

Azektif	Nom santiman
Mounira bien desi.	desepsion
Marcel ankor etone par so sikse.	
Ala to inpasian la!	
Mo mama ankoler akoz mo betiz.	
Sara-Jane pe gagn onte pou rantre.	
Kifer to zalou?	
Mo zwaye kan mo trouv tou dimounn ansam.	
Zordi, mo santi mwa tris.	

4. Rakont to santiman pandan lektir sa text-la e apre lektir.

Li ti la. Mathilde ti sir ki li ti pe kasiet kikpar dan nwar. Mathilde ti mem kapav tann li respire. Li ti pe resanti...koumadir...bann vibrasion dan ler. Ti ena enn loder ousi. Kouma li finn kapav rant dan lakaz? Li ti krwaz so lizie zonn, talerla dan lakwizinn. Bann lizie menasan. Vit-vit, Mathilde ti al kasiet deryer laport plakar. Zame li finn santi li gagn per koumsa. Li bizin sove. Me, kotsa pou ale? Tou bann laport ferme. Sel sorti ki reste se laport balkon. Mathilde deside pou tant so sans ek li galoup ziska laba.

"Miaaaoouuu!", sat Mathilde kriye.

Enn sel kout, li nek sot lor gro lera-la.

5. Rekopie sa text-la ek soulign bann mo ou expresion ki exprim enn santiman.

Depi avan soley leve, Sael lor so lipie. Enn lazwa imans pe reflekte lor so figir ek li santi kouma bann papiyon dan so vant. Zordi, Sael pou fer enn nouvo pa dan so lavi. Li extra kontan parski li pe al etidie dan enn liniversite dan Lostrali.



DIKTE

1. Dinozor

Dinozor, se bann reptil preistorik ki finn viv lor later anviron de san vintwit milyon lane avan. Bann dinozor ti bien enorm. Ena ti pe pez katrovin tonn ek ti fer karant met longer. Par kont ena ti tipti kouma enn poul ek zot ti pez wit liv.

2. Kouma aranz enn manzwar pou zwazo?



- 1. Rod enn boutey plastik.
- 2. Rod de kouyer.
- 3. Pers enn trou dan boutey-la dan enn fason kot trou-la travers lot kote.
- 4. Fons lamans kouyer-la dan trou-la.
- 5. Plas deziem kouyer-la parey.
- 6. Ranpli boutey avek manze (diri, may kraze, dipin rasi kraze, etc.)
- 7. Atas enn lakord dan lagoul boutey.
- 8. Met manzwar apandan dan lakour.

3. Lariz konper Zako

Enn zour konper Zako ki pa ti konn naze ti anvi travers Grande Rivière Sud Est. Kan li ariv laba, li trouv konper Lisien. Deswit konper Zako sezi lokazion ek demann li led. Konper Lisien demann konper Zako mont lor so ledo ek zot finn koumans zot vwayaz. Kan finn ariv omilie larivier, konper Lisien dir ki so papa bien malad ek dokter Poul finn preskrir enn laservel Zako.

"Mo pou donn mo papa to laservel pou manze," konper Lisien dir.

"Ayo! To pa ti kapav dir mwa sa depi avan. Mo pa ti pou kit mo laservel lor pie koko. Retourne aster!" Konper Zako replike avek enn lotorite.

San perdi letan konper Lisien retourne ek zot al kot pie koko. Kan konper Zako mont lor pie koko, li kriye, "To rod mo laservel move inbesil. Ale! Sinon to pou gagn kout koko lor to koko!"



DESKRIPSION (2)

Dekrir enn plas

Parey kouman pou deskripsion enn dimounn, manier dekrir enn plas pou depann lor rezon ki nou fer li ek ki li pou servi.

Enn deskripsion kapav bien long ou extra kourt, tou depann.

Exanp:

Si nou pe dekrir enn landrwa kot finn ena enn aksidan pou enn depozision, nou deskripsion bizin bien presi ek kontenir bann detay faktiel.

Ariv enn moman zis apre Montagne Ory kot larout koumans desann, ek lapant-la ale mem lor plis ki 300 met. Kote gos, ravin, kote drwat "lane" bann loto ki pe desann Port-Louis. Lor tou sa distans-la, pena okenn "lay-by" kot kapav borde.

Parey si nou pe dekrir enn lanplasman, meton ki to bann paran pe rod enn lakaz pou lwe ek ki enn tonton pe dekrir enn batiman ki li finn trouve.

Lakaz-la extra bien sitie. Li trouv St Jean, lor larout rwayal mem, me lakour devan gran ek ena boukou zarb ki devet kas tapaz lari. Toule de bistop monte-desann pre. Bis Port-Louis sorti depi Vacoas, Quatre-Bornes ek Curepipe tou. Ena laboutik, tabazi ek mem enn boulan-zri tou lamem. Lekol primer ek kolez tou bien pre. Bann vwazin ousi de kote bann bon fami, bien trankil.

Kan nou dekrir enn plas, nou kapav donn linformasion lor kouma plas-la ete, ki bann kiksoz ki rann plas-la diferan.

Exanp:

Port-Louis trouv lor lakot Nor-Es lil Moris. Port-Louis lavil ki pli anime dan nou pei. Li enn sit administratif ek finansie. Sa lavil-la koumadir enn losean kiltirel ek istorik. Bazar santral, enn bann plas ki pli bien vizite. Laba vann legim, fri, zepis ek ousi bann prodwi artizanal. Pre kot lamer ena Waterfront, kot kapav kas enn poz ek admir lepor. Sel ipodrom ki ena dan nou pei trouv dan sa lavil-la. Champ de Mars pli vie plas lekours dan Losean Indien. Inpe lao ena Fort Adelaide, enn plas ideal pou admir lavil-la an-antie. Malgre ki fer bien so dan Port-Louis, enn zourne veikil sirkile lor lari ek boukou dimounn ale-vini.

Me si nou pe rakont enn zistwar, nou kapav pe fer enn deskripsion pou dir kouman landrwa-la ete me ousi fer santi enn lanbians, enn latmosfer.

Exanp:

- Zot pran enn santie ki pas atraver baraz feyaz ek zot debous dan enn gran karo kann kot ti fek fer lakoup e ki ti ranpli lalimier ek tou kalite parfin; enn ti labriz pe soufle.
- 1. Mo swazir 2 landrwa ek mo ekrir enn paragraf pou dekrir sakenn:
- a. mo klas b. mo lekol c. mo landrwa
- d. mo pei e. enn larivier



Lucky (2)

Mo gran lamour, se mo lisien Lucky. Li ti enn zoli lisien. Li ti pe konpran tou seki mo ti pe rakont li. Aswar, li ti pe vinn get mwa ek mo ti pe fer li dormi. Aster li finn mor. Enn bann dimounn inn bat li lor so latet ar baton, mo pa kone kifer. Li mank mwa boukou. Souvan mo mazinn li. Plito gagn zafer ar Lucky ki ek bann dimounn. Parski enn lisien, to kapav koz ar li, to kone li pa pou al koz to koze. Pena palab. Ek bann dimounn, a sak fwa to rakont zot enn zafer prive, zot al repet sa partou kote. Sa fer mwa ankoler.



Sak fwa ki mo ti sagrin, mo ti al get li pou gagn enn rekonfor, kav arive mo plere ar li tou. Mo rakont li mo bann traka, lerla, parfwa li ti pe plore ek mwa. Apre lamor Lucky, kan mo mama ti pe dir so nom, sa ti fer mo leker fermal, sa ti rann mwa bien tris. Lucky ti kouma enn dimounn mem pou mwa. Si li ti sagrin, li ti pe vinn partaz sa ar mwa. Mo ti fini konpran ki li ti pe gagne. Kan so vant ti pe fermal ouswa si li ti pe anvi vomi, mo ti pe pran li kont, mo fer dile mo donn li. Kan mo ti pe al lekol, li ti bien ankoler. Li ti pe mord-mord mo lipie, ris mo seve. Li pa ti oule ki mo ale, kit li tousel. Avek Lucky, mo ti pe partaz ziska nou manze defwa. Enn ti yaourt ousi li ti kontan.

Mo'nn gagn enn ta lezot lisien apre Lucky, me mo ti dir zot ki zame zot pou vo mo Lucky. Bann kamarad garson ek tifi ousi parey. Enn zour zot anvi koz ar twa, enn lot zour non. Pa Lucky. Li, li ti touzour la. Zame mo'nn konsider li kouma enn lisien. Dernie fwa mo'nn trouv li, li ti pe kriy-kriye ek li'nn mont lor mo zenou. Kan li'nn mor, mo'nn extra plore. Ena defwa kan mo tris, mo al asiz pre ar so tom. Li'nn antere deryer nou lakaz. Lerla mo dir li ki, si li ti vivan, mo ti pou rakont li tou mo lasagrin.

Azordi, zame mo pou kapav re-apel enn lot lisien Lucky. Personn pa konparab ar Lucky. Parfwa arive, mo koz-koz li ar mo mama. Li dir mwa ki mo bizin arete. Li repet mwa ki li'nn mor aster. Me mo bizin fer li konpran, ki pou mwa, Lucky touzour la dan mo leker...

KESTION

- 1. Ki sann-la so zistwar pe kontigne isi?
- 2. Kouma Durla so lisien ti apele?
- 3. Ki finn ariv Lucky? Kouma finn ariv sa?
- 4. Ar ki sann-la Durla ti abiltie konfie li?
- 5. Ki Durla pa kontan ditou ek met li ankoler?



Kamini pe souy enn ti larm ki finn perle kot so lizie. Leo dan niaz. Vanessa pe mazinn so lamitie avek Leo. Koumadir pena okenn zelev dan klas. Sakenn pe paret perdi dan so panse.

Misie Kevin tir zot dan zot revri kan li dir, "Mo finn swazir sa de zistwar-la parski sakenn montre nou ki dan lavi ena bann zoli zafer ki arive e parfwa ousi ena bann zafer ki fer nou tris. Me dan tousala, nou bizin aprann fer zefor ek avanse ek rann nou lavi zoli."

"Kifer ou pe dir nou sa bann zafer-la, Misie?" Leo demande.

"Nou finn pas plizier lane ansam. Mo finn trouv zot grandi. Aster, zot pre pou kit lekol primer pou koumans enn lot letap dan zot lavi. Parey kouma zot ti dir bay-bay lekol maternel, aster zot pou dir bay-bay lekol primer. Dan kolez, zot pou parmi bann pli tipti. Defwa li pou difisil. Me, zot pou ena nouvo kamarad ek zot pou aprann boukou nouvo zafer."

Misie Kevin, lemosion dan lavwa, kontinie, "Mo swet zot bonn sans pou zot lexame. Pa panike sirtou! Zet enn koudey lor zot papie net dabor pou gagn enn lide bann kalite kestion ki ena; travay dan ninport ki lord ki zot oule me fer tou kestion.

Ale, bonn vakans e bonn sans pou zot bann nouvo lavantir! Ki kone? Enn zour ena parmi zot kapav vinn profeser lekol zot ousi, ki zot panse?

Tou zelev leve, tap lame, kriye, "Ip ip ip! Wehhhh! Mersi Misie Kevin!"

Sa swar-la, sak zelev finn rev lavenir ki li ti anvi ena...

- 1. Ki reaksion bann zelev apre lektir text Durla?
- 2. Kifer Misie Kevin finn fer so klas lir zistwar Deny ek Durla?
- 3. Ki Misie Kevin dir so klas lor kolez?
- 4. Ki konsey Misie Kevin donn zot pou lexame?
- 5. Ki lavwa Misie Kevin montre?
- 6. Ki manier bann zelev exprim zot rekonesans pou zot profeser?
- 7. Apart rekonesans, ki santiman bann zelev pe devet resanti kan zot kriy "Ip ip ip! Wehhhh!"?

KESTION ORAL



AKTIVITE KONPREANSION

1. Mo	reponn par <i>vr</i> e (V) ou <i>fos</i> (F).	
a. b. c. d. e. f. g. h. i. j. k. l.	Durla finn ena boukou lisien me Lucky finn res so prefere. Durla ti pe rakont tou so bann problem so bann kamarad. Durla ti pe partaz ziska so manze avek Lucky. Durla ti apresie Lucky parski lisien-la ti pe temwagn li boukou lafeksion. Durla ti plore boukou apre lamor Lucky. Durla apel tou so lisien Lucky. Durla kontan so bann lisien me se so mama ki swagn zot. Durla paret enn tifi bien tousel. Durla kontinie rakont so bann sekre Lucky. Misie Kevin donn so klas bann bon konsey. Misie Kevin panse ki profeser, se enn fay metie. Kamini finn bien touse par zistwar Durla.	
2. Mo	reponn bann kestion dan mo kaye.	
a. b. c. d. e. f. g.	Kifer Durla ti prefer koz avek so lisien plito ki avek bann dimounn? Kouma Durla ti pe okip Lucky kan li ti malad? Kouma Lucky ti pe montre so mekontantman sak fwa Durla ti pe al lekol? Apre lamor Lucky, kot Durla ti pe ale kan li ti tris? Kifer? Ki fraz dan sa text-la dir twa ki Lucky ti plis ki enn lisien pou Durla? "Koumadir pena okenn zelev dan klas." Ki to konpran par sa fraz-la? Ki lemosion sa text-la finn fer twa resanti?	
4. Mo	rod sa bann mo-la dan pasaz ek mo donn enn sinonim pou sakenn.	
a. b. c. d. e.	mor prive rekonfor sagrin konsider	
3. Mo	reponn sa bann kestion-la dan mo kaye.	
a.b.c.d.e.	Eski twa ousi to ena enn zanimo ki finn vinn to meyer kamarad? Ekrir enn lor ki to kontan ar li. Sinon, ekrir enn paragraf lor dimounn ki finn vinn to meyer kamarad ek apresie ar li. Kan to gagn enn gro sagrin, ar ki sann-la to al koze? Dapre twa, kifer sa fer dibien koz ar kikenn kan to sagrin, kan to gagn pe kan to ankoler? Dekrir enn landrwa ki to pli kontan dan to lekol ouswa dan to lakaz. Eski to finn mazine dan ki kolez to ti pou kontan ale? Dekrir li ek dir kifer kontan al laba.	dir ki to
5. Mo	explik sa bann mo ek group mo dapre zot lanplwa dan pasaz.	
a. b. c. d.	konparab	



Verb ki exprim aksion mantal

Fer kouma Andy

Touletan Andy ti reve pou vinn enn Matematisien. Pou realiz so rev, Andy kone ki li pou bizin aprann bien. Depi tipti mem Andy finn koumans fer zefor. Li deside pou leve boner toulezour. Kouma revey anons sink-er-edmi, Andy deza instale devan so latab. Pandan pre de-z-er d'tan, Andy konsantre lor so liv ek so kaye. Li travay dan bann lezot liv Matematik ousi ek li pran bann revi kot ena bann zwe Matematik prete libreri. Andy finn memoriz bann tab miltiplikasion bien vit; li kalkil bann adision, miltiplikasion ek soustraksion ziska trwa sif san papie, ledwa ou "abacus". Profeser dan klas finn rekonet lintere Andy ek so bann zefor. Li finn ed Andy pou al pli lwin. Zordi Andy pe kontinie so letid. Li pe prepar li pou li al liniversite, pou fer enn B.Sc in Mathematics. Apre sink lane, telman Andy finn metriz bann konsep Matematik enn iniversite dan Lamerik finn konvok li pou enn interview.

Mo dekouver

- 1. Mo observ bann mo ki an rouz dan text lao la.
- 2. Eski mo trouve ki se bann verb?
- 3. Eski se bann verb aksion fizik, swa bann verb ki exprim enn leta, enn santiman ou enn lemosion?

Ki mo bizin rapel?

Ena diferan kategori verb. Pli gran kategori, se bann verb aksion (fizik); apre ena bann verb leta ek verb santiman. Me ena ousi bann verb aksion mantal. Zot pa form enn gran kategori me zot inportan.

Ki ete enn verb ki exprim enn aksion mantal?

Enn verb ki montre enn aksion ki pas dan nou latet. Ex: panse, bliye, konpran, etc.

Mo antrene

4. Mo soulign bann verb ki exprim enn aksion mantal.

telefone devine galoupe reve rapel resite reflesi prepar momem kalkile dir prepare realize observe soupsone krwar

- 5. Mo explike ki manier "realize" ek "lir" kapav servi kouma verb aksion ek ousi enn verb mantal. Mo fer enn fraz avek sakenn sa de itilizasion verb-la.
- 6. Mo trouv enn verb mantal pou sakenn sa bann definision-la.
- a. konsidere, examine dan latet →
- b. gard dan latet/memwar →
- c. perdi depi dan memwar/pa kapav retrouve dan memwar →
- d. fer enn rezonnman dan latet →
- e. retrouve an memwar apre enn moman, enn peryod →
- 7. Mo rod enn verb ki exprim aksion mantal apropriye pou ranpli sak tire.
- a. Mazistra finn _____ pou kondann akize-la.
 b. Owen pe gagn per akoz li finn _____ leson ki ti sipoze aprann.
 c. Celina enn tifi malinn. Li bien vit.

1. Mo swazir bon repons.

- zalou
- a. riy zonn dekonserte
 - ere
 - kontan
- b. larm krokodil sagrin
 - ipokrit
 - kapon
- c. poul mouye pares
 - blese
 - ankoler
- d. pwason dan dilo tris
 - alez
 - dezespere
- e. sap lor kal ankoler
 - soke
 - gagn per
- **f. leker bat dan mole** gagn onte
 - gagn fre
 - fer enn remark pou koriz kikenn
- g. bros so koko felisite
 - kestione

2. Mo explik sak expresion ki finn done.

- a. pe trouv zekler
- b. pe pokpok
- c. mars dan lezer
- d. disan pe bwi
- e. leker lour



1. Mo relie sak sign ponktiasion avek so definision.

•	servi pou exklame
•	terminn enn fraz
(())	servi pou poz kestion
<u>!</u>	servi pou signal diskour direk
?	mark enn ti poz dan enn fraz
(;)	signal separasion ant serten
	group mo dan enn fraz

2. Mo ranpli sak bwat avek ponktiasion ki manke.

De konde finn aranz zot nik dan baraz banbou∟ Ti ena trwa dizef avek bann tas maron
ladan⊡ Enn dan sa de konde-la finn kouve pandan plizier zour⊡ Lot-la ti pe veye ek ti pe
amenn manze⊡ Enn Samdi gramatin⊡ dizef finn eklo⊡ Magali get zot li kriye⊡ ⊡Get kou-
ma sa trwa ti konde-la adorab□□

3. Mo ponktie sa bann fraz-la.

- a. eski to pou pas get mwa Samdi
- b. get sa zoli rob-la
- c. nou finn al kas goyav desinn Plaine Champagne
- d. galoup pli vit
- e. kifer trouv zetwal zis dan aswar

DESKRIPSION (3)

1. Mo ekrir enn text pou dekrir ek rakont enn senn ki mo finn trouve.

Dan rekreasion, to finn temwin enn zafer inabitiel . De misie travers baraz ek rant dan lakour lekol.

Paragraf 1 (Introdiksion)

Dan sa paragraf-la, dir kan ek kot zistwar-la pe pase e ki dimounn ki la. Donn inpe detay ek lanbians.

Kot to ti ete e ki to ti pe fer?

Ki moman lazourne ti ete?

Avek ki sann-la to ti ete? Ki zot ti pe fer?

Kot lezot zelev ti ete? Ki zot ti pe fer?

Paragraf 2 (Ki manier tou koumanse)

Ki de misie-la resanble? Donn enn deskripsion fizik me ousi dir ki kalite dimounn zot paret ete. (Enn ou de mo kapav sifi a sak fwa.)

Kouma zot finn travers baraz ek kot sa?

Ki manier sa finn posib?

Ki zot lintansion dapre twa? Kifer to dir sa?

Paragraf 3 (Ki manier sitiasion kontinie)

Ki zot finn fer, to (bann) kamarad ek twa kan zot trouv sa de misie-la?

Eski lezot dimounn, zelev, staf biro, profeser, etc., ousi finn trouv zot? Ki finn zot reaksion? (Swazir donn reaksion zis enn-de (group) dimounn.)

Ki de misie-la finn fer lerla?

Paragraf 4 (Ki sitiasion alafin)

Ki manier tou finn fini? Eski lekol finn pran sertenn desizion apartir la?

2. Mo swazir enn evennman ek mo ekrir enn text pou dekrir li.

- Fet lamizik dan lekol
- b. Selebrasion lindepandans dan lekol
- c. Zourne sportif dan lekol



Prodiksion elori

3. Mo observ sa desin-la pou ekrir enn zistwar.



4. Mo ekrir enn text pou rakont sis lane ki mo finn pase dan lekol primer.



Enn zoli liv
Ouver so bann paz
Rakont zistwar lavi
Bann zoli zimaz bien saz
Me ki koz tou langaz
Parfwa kre bann loraz
Dan memwar bann ti zanfan pa tro saz

Zoli liv ouver so paz
Enn zoli leker ek boukou fler
Mmmmmm
Lamour dan ler
Leker bate, galoupe, sote, palpite
Enn ti bonom asize dan liv
Ek enn ti mamzel bien zoli
Enn bon parfin roz
Ki grat lagorz
Zot leker bat for...
Boum, boummmm...

Liv vir so paz
Lavi gard boukou sirpriz...
Liv koumans sante
Enn zoli melodi...
Li fer enn ti parodi.
"Dodo dodo baba gate, sat maron pa nanan twa"
"Dodo baba gate sat maron pa nanan twa"

Liv-la ere, zwaye
Zwaye kouman enn zoli ti baba dan lebra
so manman
Lavi zoli, kan enn manman donn lavi
Enn lavi san pri...
Divan soufle dan paz
Fer boukou ti tapaz
Li tourmante, boulverse
Lor paz, ni enn zimaz
Kinn arive...

Bann mo balote lor paz
Kouman bato balote lor delo.
Tousel perdi dan losean lavi.
Zoli liv ferm so paz lor zistwar lavi.
Enn zour zoli liv pou ouver so paz.
Pou twa ti zanfan pa tro saz.
To tour ekrir enn ti zistwar.
Twa gardien tou memwar.
Enn zour gardien limanite.

Christianna Perrine, "Enn liv". 2016



DISKISION ORAL

1. Mo observ ek dir ki santiman ou lemosion sa bann zimaz-la evoke.









2. Mo dir ki lemosion ek santiman mo resanti dan sa bann sitiasion-la.


- a. Mo gagn enn bon rezilta lafin lane.
- b. Mo ofer enn kado mo mama
- c. Mo ti frer malad.
- d. Enn kamarad pe demenaze.
- e. Mo nepli per pou lir enn liv plis ki san paz.
- f. Mo tann premie mo enn ti-baba.
- g. Mo dekouver pou trwaziem fwa ki larou bisiklet finn plat.
- h. Mo finn pini pou enn zafer ki mo pa finn fer.
- i. Mo tann enn son bizar aswar dan nwar.
- j. Mo pe get enn fim kot ena vanpir.



PRODIKSION ORAL

3. Enn zanfan al kot dokter. So vant pe fermal.

Imazinn enn konversasion kot li pou bizin explik so douler dokter.





DISKISION ORAL

Enn pasion.

Finn ariv | dernie trimes lekol. || Bann zelev | paret bien fatige. || Zot tou | pe per lexame PSAC | ki pe vini. || Zis sa mo-la | fer zot gagn | enn lespes trak, | enn zafer ki trap vant, | korde. || Misie Kevin dir | ki li normal | resanti enn lafreyer | kan nou pans sa lexame-la. || Se parski se | enn evennman inportan | lor ki pou ziz | tou zot parkour dan primer. ||

Me Misie Kevin ousi dir ki zot bizin konbat sa lafreyer-la. || Zot tou finn bien serye | toutlong lane | ek mem depi First; || zot bizin aprann | fer zotmem konfians | ek pa les | sa lemosion negatif la | afebli zot kapasite | ek dekouraz zot. || Li oule zot apresie | zot bann dernie mwa ansam | e ki zot prepar | zot lexame avek konfians | ek serenite. || Ala so bann dernie mo: | "Mo konn zot kapasite |ek mo ena foul konfians | dan sakenn isi!" ||

Bann parol Misie Kevin | finn fer tou zelev | rekinke. || Zot nepli trakase. || O-kontrer | enn lafors | monte dan zot | ek zot figir ek zot regar | eklere. || Sakenn santi li | kouma enn sanpion | ki pe al ver enn viktwar. ||

Misie Kevin | paret satisfe. || Li anonse | ki li finn amenn | enn liv | ki apel Nou Rises e dan ki | ena zistwar personel | sis zenn | ki viv | dan parti Les Moris. || Ena de zistwar | ki li anvi partaz avek zot. ||

"Zot pe rakont zot lavi?" | Leo demande. |

"Wi. || Zot rakont sirtou | ki bann zafer | ki finn fer zot | grandi. || Ena bann bon lexperyans | me ena ousi | bann sitiasion difisil | ki zot finn viv. || Sa bann zistwar-la | pou montre zot | ki dan lavi, | nou ena bann moman | ki fer nou viv diferan lemosion | kouman lazwa, latristes, laper ou lakoler," | Misie Kevin reponn. ||

Li kontinie, | "Nou pou departaz |sak zistwar | pou ki sakenn dan klas | kapav lir a ot-vwa.|| Sak zelev | pou lir enn paragraf | e kouma li fini, | li pou pas liv-la | so vwazin. || Pa bliye, | li bon ki zot pran | dis ou kinz segonn| pou get parti ki zot pou lir | avan zot koumans | zot lektir a ot-vwa." ||

"Nou pou koumans | avek zistwar Deny. || Se enn garson | ki mo sir | zot pou apresie!" ||

Premie zelev koumans lir...

Mo'nn dekouver | ki mo ena enn pasion: | desine. ||

Mo ti pou kontan desinn bann vag | ki pe vinn kraz brit-brit | kont bann ros nwar |lor enn zil... ||

Parfwa |mo al lapes dan lagon | avek bann kamwad | ... pre ar enn zil; | so nom | mo nepli rapel... || San ki nou rann nou kont, | nou deles bor laplaz | pou nou al lwin dan lagon. ||



Kan lokazion prezante aswar, | zame mo fatige admir | bann zimaz feerik | ki mo trouve kan mo get deryer, | kote laplaz... || lwin laba, | mo trouv | bann lalimier lotel St Géran ||: ble, rouz ek blan. || Zot paret | pe detas zot | ek pe naze lor so bann vag, | koumadir bann girland Nwel | lor fon enn tapi zetwal. ||

Parfwa, | kan nou pa ti pe atann, | sa bann pwin lalimier briyan la | repann zotmem | kouma enn bouke kas-lizie | e zot al zwenn | bann zetwal lao dan lesiel. | Zot pa paret afekte | par grander | bann montagn nwar | ki ena par deryer. || Depi kot nou ete dan lagon, | nou tann explozion | bann fedartifis | ki pe desir silans nou lanwit | avek enn tapaz mat... ||

Parfwa, | kler-de-linn | permet nou fer diferans | ant bann diferan kouler pwason | ki dormi trankil dan dilo kler lagon, | kot nou pe traverse. | Nou kontan kont zot... | Bann zegwi nwar ek rouz | bann oursin drese | kan nou lipie frol ar zot. |

Inn deza arive | kot enn sel kou, nou trouv | bann lalimier St Géran | plonz dan dilo lagon. | Lerla, | manto lanwit | anvlop nou | e nou realize | ki lalimier bann zetwal pa ase | pou montre nou sime | pou retourn lakaz. ||

E kan sa koupir kouran | ki rann nou aveg la | arive, | nou oblize retras nou sime. || Dernie ler, | nou res | zis son bann vag | ki pe kraze | avek laraz, | lwin, | kont ros bann zil, | ki servi nou kouma gid. ||

Evaliasion

LEKTIR KONPREANSION



MISIE SOLEY EK SO BANN ZANFAN

Lao dan lesiel, ena enn landrwa ki apel Vilaz Soler. Vwa-lakte, enn vie bolfam, res laba avek so garson, Misie Soley ek so wit ti-zanfan. Zot tou ron kouma enn boul ek kolore kouma Chamarel. Bann zanfan-la kontan zwe laronn. Enn zourne zot tourn otour zot papa, Misie Soley.

Misie Soley so pli gran zanfan apel Merkir. Li pena enn bel kalib me li bien rapid. Li kontan res pre avek so papa pou resof limem.

Venis, deziem zanfan dan lafami bien zoli. Li resanble enn bizou ki ranpli avek lor masif. Li explozif kouma enn volkan me selma li bien salere. Telman so latet dan niaz, ki li fer bann zafer alanver.

Trwaziem-la apel Later. Avek enn natir ekilibre ek enerzetik, li finn vinn enn plas kot boukou lespes viv. Souvan li profit bann moman pou zwe avek so kamarad lalinn. Sa kamarad-la touletan rod protez Later. Parey kouma lizie so granmer Vwa-lakte, Later enn kouler ble manifik.

Mars, katriem zanfan dan lafami-la, souvan rouz avek lakoler. Akoz sa, li pa tro kontan zwe avek lezot ek li prefer res tousel. Me so bann frer touzour ape trap so lame pou fer li vinn zwe.

Sinkiem zanfan pli kosto ek li apel Zipiter. Li finn gagn bann tas blan ek maron parski li kontan roul dan lapousier.

Satirn, siziem zanfan ena enn gran bote sirtou avek so bann kouronn zonn ki briye. Li bien salere ek li bien kontan kan li antoure avek so frer ek ser.

Zistwar setiem zanfan, Iranis, inpe tris. Kan li ti tipti li ti fer enn aksidan dan Vilaz Soler e depi sa zame li kit so bann frer ek ser. Li kouler ble-ver ek li zwe laronn avek led so kamarad divan.

Avan dernie zanfan apel Neptinn. Malgre ki li ena enn gran lenerzi, li kapav res diskre ek kalm. Li kontan sanz-sanz so kouler kouma enn kameleon. So kouler prefere se ble-pal.

Dernie zanfan Misie Soley ti apel Plito. Limem ti pli frazil ek touletan li ti pe tranble avek freser. Alor Misie Soley ti avoy Plito res kot so granmer Vwa-lakte pou ki li gagn inpe lafors. Me li finn disparet ek Misie Soley retrouv li, depi sa, avek zis wit zanfan.

1. Reponn par Vre ou Fos. Met "V" ou "F"dan ti-kare akote sak fraz.

a.	Venis resanble enn bizou.	
b.	Lalinn ek soley, de bon kamarad.	
C.	Mars res touletan ankoler.	
d.	Satirn kontan res tousel.	
e.	Witiem zanfan Misie Soley apel Neptinn.	
f.	Aster Misie Soley ena zis wit zanfan.	
a	7is lor Later ki ena bann lespes vivan	

Lektir konpreansion

2. Relie sak bon repons.	
	 zwe lamarel
a. Bann zanfan Misie Soley	kontan • zwe laronn
	• zwe lamarel.
	• amikal ek zoli.
b. Venis bien	• move ek zoli.
	• frazil ek zoli.
	• zonn
c. Later kouler	• rouz
	• ble
	• Satirn
d. Enn zanfan ki pena kama	rad se • Iranis
	• Mars
	• wit zanfan
e. Alafin, Misie Soley retrouv	v li avek • dis zanfan.
	• nef zanfan
3. Trouv kontrer sak mo ek	servi li dan enn fraz.
a. vie:	
b. rapid:	
c. kontan:	
d. frazil:	
4. Explik bann expresion ki	finn done dan to prop mo.
a. enn bel kalib	
b. latet dan niaz	
c. sanz-sanz so kouler k	ouma enn kameleon
d. rouz avek lakoler	
5. Reponn bann kestion da	
a. Kot Vilaz Soler trouve	
	af, ki bann zanfan Misie Soley fer enn lazourne?
c. Kifer Merkir kontan resd. Telman so latet dan ni	s pre ar so papa <i>?</i> iaz, ki li fer bann zafer alanver. Ki sann-la so latet dan niaz?
	tas blan ek maron lor li?
·	n ek so bann frer ek ser?
	mansione dan sa text-la?
h. Donn enn lot tit pou sa	



LOR LAPIS BANN DIYA

Gromarto nepli pe tini anplas depi de-trwa zour. Tikoulou ti pe dir li ki pou ena enn gran sirpriz pou Divali. Me Tikoulou pa finn dir plis. Ki sirpriz pou ena? Enn zoli linz nef? Enn montagn gato zis pou li? Enn led pou netway lakaz an-gran avan fet lalimier?

Gromarto ti pe bien inpasian pou kone.

"Sirpriz!", anons Tikoulou lavey Divali.

Enn tifi, ki Gromarto zame finn zwenn, pe debout akote Tikoulou. Li toutswit rekonet Lalie. Tikoulou finn telman koz so kamarad avek zoli lizie ble ki vinn depi Larenion.

"Se pli zoli sirpriz!" Gromarto dir. "Bienveni kot nou!"

Pandan ki Gromarto pe terminn preparasion bann gato, Tikoulou ek Lalie al rann vizit enn artizan ki fabrik bann diya. Se sa bann ti lalanp delwil ki fer ar later ek ki nou alime pou Divali.

Malerezman, res zis enn sel. Tou finn fini vande!

Artizan ki fabrik sa bann lalanp-la, enn potie, propoze ki li montre zot kouma fabrik lalanp. Res ankor enn tigit later labou, zis ase pou fer de ti lalanp.

"Zot parfe. Sa mamzel-la aprann bien vit!" artizan felisit zot. "Aster nek zis ena pou fer zot sek dan enn four."

Landemin, Kaskot ki enn kamarad Tikoulou, amenn Lalie Port-Louis pou aste enn zoli sari pou Divali. Se enn tradision sa, bizin met enn linz nef pou fet lalimier. Zot tou bizin krint aswar!

Kaskot ek Lalie pe bien amize pandan bann eseyaz. Zot finn rant bon kamarad!

[...] Bann kamarad finn donn randevou Triolet aswar. Gromarto, Matapan ek Tikoulou finn abiye kouma bann prins indien. Zot tou ena bann ti-bwat gato dan zot lame.

Kaskot ek Lalie ti bien zoli dan zot sari.

"Ala nou bann Lakshmi!" Gromarto dir avek fierte kan li trouv sa de tifi-la.

"Ki sann-la sa, Lakshmi?" Lalie demande.

"Se dees labote ek limazinasion. Li touzour abiye avek enn sari rouz. Li reprezant lalimier!" Gromarto reponn.

Tradiksion Tikoulou. La piste des diyas, Vizavi, 2007



1.	Reponn par <i>Vre</i> ou <i>Fos.</i> Met "V" ou "F"dan ti-kare akote sak fraz.	
a. b. c. d. e. f.	Gromarto tris depi inpe zour. Tikoulou anonse ki pou ena enn sirpriz pou Nwel. Ena sink personaz dan sa text-la. Lalie enn Renionez. Kaskot ti al dan kapital pou aste sari. Lalie ek Kaskott de bonn kamarad depi tipti. Zour Divali, Gromarto, Matapan ek Tikoulou ti abiy kouma bann prins indien.	
2.	Reponn bann kestion dan to prop mo.	
a. b. c. d. e. f. g. h.	Kifer Gromarto "nepli pe tini anplas"? Kan eski Tikoulou pou prezant so sirpriz? Kouma Gromarto rekonet Lalie? Kot Tikoulou ek Lalie ti al rod lalanp? Ki pou fer avek sa bann lalanp-la? "Sa mamzel-la aprann bien vit!" Ki mamzel sa? Kifer bizin met linz nef? Ki dees reprezant lalimier? Donn enn lot tit pou sa text-la. Donn tou azektif ki dan premie paragraf.	
	Trouv lekontrer sak mo ek servi li dan enn fraz.	
a. b. c. d. e.	nef zoli inpasian vande aswar	
5.	Explik sa bann mo-la dapre pasaz.	
a	an-gran h artizan c narfe d limazinasion	

Letter konpreassion

Zordi tou zenes ena omwin enn per tenis. Laplipar zanfan met sa kalite soulie-la pou al lekol. Me lontan zis bann sportif ki ti pe met sa bann soulie-la.

Soulie tenis, se dabor enn soulie ki ena enn semel karotsou. Karotsou, se enn matier ki finn dekouver ena plis ki 500 an de sela. Me se zis ver bann lane 1850 ki Goodyear, - li finn donn so nom enn mark larou loto bien seleb - finn fabrik premie semel karotsou.

Premie soulie tenis ki fabrike, se anfet enn per soulie an latwal avek enn semel karotsou. Sa de matier-la fer soulie-la gard enn gran souples, seki fer ki li finn permet bann sportif fer bann top performans ki pa ti posib avan.

An 1890, enn serten Foster met an vant enn soulie avek bann pwint ki permet bann atlet galoup pli bien: "spike-shoes" ti finn ne! Se dayer Foster ki kree mark Reebok.

Adidas ek Puma, de lezot mark soulie tenis, kree par de frer, Adolf ek Rudolf Dassler, ver 1950. Nike, enn lot mark ki tou dimounn kone, pli nouvo; li finn kree an 1972 e an 1989, Nike invant semel avek enn kousin ler: Nike Air. Sa mark-la gagn so bel repitasion gras a Michael Jordan ousi, enn gran basketer ki adopte li ek fer so piblisite.

Apartir bann lane 1970, nepli met soulie tenis zis kan pe fer spor; mem bann dimounn ki pa fer spor ditou koumans met sa kalite soulie-la zot ousi. Sa soulie-la koumans mem vinn enn lamod dan bann gran lavil, kouma New York par exanp. Bann danser rap fer sa vinn enn parti zot labiyman; li mem enn akseswar indispansab pou zot.

Finalman zordi ena soulie tenis spesial pou sak spor, depi foutborl ziska basket, tenis ou atletism, me ena ousi soulie tenis pou bann ti zanfan, zom ou fam. Ena mem bann soulie tenis chic pou al bann fet. Dernierman finn invant bann model soulie tenis avek enn talon konpanse andan pou bann madam ki kontan "lelegans femininn". Dore, arzan ouswa avek briyan, trouv tou kalite soulie tenis zordi.

Lontan, dan Moris, ti pe apel bann soulie tenis an latwal avek semel karotsou "soulie lapin", parski zot ti blan ek ti pe netway zot avek enn prodwi ki resanble "blanko" zordi!



1.	Reponn par <i>Vr</i> e ou <i>Fos.</i> Met "V" ou "F"dan ron akote sak fraz.	
a. b. c. d. e.	Lontan se zis bann sportif ki ti pe met tenis. Semel karotsou finn fabrike 500 an de sela. Bann frer Dassler finn invant "spike-shoes". Ena plizier kalite tenis azordi. Azordi ena bann soulie tenis avek talon konpanse.	
	Reponn bann kestion dan to prop mo.	
a. b. c. d. e.	Kouma premie soulie tenis ti ete? Ki kiksoz ki spesial ar bann "spike-shoes"? Ki sann-la fer Nike Air vinn popiler? Kifer? Kifer soulie tenis vinn lamod apartir bann lane 1970? Lontan, kouma ti pe apel bann soulie tenis dan Moris?	
3.	Donn enn sinonim pou sak mo.	
a. b.	fabrike posib	

- 4. Rekopie tou adverb ki dan dernie paragraf.
- 5. Explik bann expresion ki finn done dan to prop mo.
- a. fer bann top performans
- b. gagn so bel repitasion
- c. enn akseswar indispansab
- d. "lelegans femininn"

C.

d.

kree

piblisite

Evaliation GRAMER



1. Indike si sa bann fraz-la zot afirmatif ou negatif.

Fraz	Afirmatif	Negatif
Exanp: Mo lekip foutborl finn gagn koup	✓	
a. Depi trwa-z-an sa pie-la pa pe raport nanye.		
b. Enn tig prefer res tousel.		
c. Dodo pa ti konn anvole.		
d. To pena drwa travers semin kan robo rouz.		

2. Transform sa bann fraz-la an bann fraz negatif.

Exanp:

To pou bwar dite.

To pa pou bwar dite.

- a. Kifer to pe ekrir?
- b. Mama finn met boukou rezin dan poudinn may.
- c. Mo anvi get ti-komik enn zourne.
- d. Phillipe pe al Larenion.
- e. Pascal konn desinn bann dimounn.

3. Transform sa bann fraz-la an bann fraz afirmatif.

Exanp:

Pa atann mwa.

Atann mwa.

- a. Kristel pa kontan manz frisiter.
- b. Mo pa dakor avek twa.
- c. Kifer to pa al pisinn?
- d. Li pa pou vinn exkirsion.
- e. Nathan pa konn koz Angle.

4. Indike si fraz-la deklaratif, interogatif, exklamatif ou inperatif.

Fraz	Deklaratif	Interogatif	Exklamatif	Inperatif
Exanp: Souvan Gaspard grinp montagn Le Pouce.	1			
a. Mo anvi tann twa sante.				
b. Ki to ti al fer Rose-Hill?				
c. Atansion, ena enn nik mous zonn lao!				
d. Ki kolez to anvi ale?				
e. Ala sa rob-la zoli la!				



5. Met rayt akote bann fraz interogatif.

a. Exanp: Ki to pou fer si li trouv twa?	✓
b. Kifer Ricardo pa kontan reponn kan poz li kestion dan klas?	
c. Bann zenes finn rasanble pou sant lim nasional	
d. Kot Brandon finn gard so lekonomi?	
e. Kouma Anielle pou sirmont sa sitiasion-la?	
f. Ena plizier anplwaye ki pankor gagn lapey.	
g. Kan Thierry pou retourn Moris?	

6. Ekrir enn fraz deklaratif avek sak group mo.

Exanp:

rar - enn

Bien rar sa foutborler-la rat enn gorl.

a. touletan - aste
b. lapli - Dimans
c. leksi - sovsouri
d. metie - anvi
e. lapousier - lasante

7. Ekrir enn fraz interogatif avek sak group mo.

Exanp:

kone - reste

Eski ou kone kot Emilie reste?

a. bwar - siro
b. anvi - bis
c. retourn - terin
d. manz - zame
e. evit - malad

8. Ekrir enn fraz exklamatif avek sak group mo.

Exanp:

lexame - difisil

Ala sa lexame-la ti difisil!

a. soley - wikenn
b. zoli - rob
c. salad - for
d. so - roti
e. azordi - fre



9. Ekrir enn fraz inperatif avek sak group mo.

Exanp:

enn - paz

Fer tansion kan to al dan bor larivier!

a. mont - lesel
b. get - direksion
c. pran - telefonn
d. trwa - desin

e. amenn - kaye

10. Dekoup sak fraz an de parti (Group Nominal ek Group Verbal).

Exanp:

Mo frer ek mo tonton pe get televizion.

Group Nominal: Mo frer ek mo tonton

Group Verbal: pe get televizion

- a. Aline ek Jessica pe aprann zwe ravann.
- b. Bann zelev Grad 6 finn fini zwe lamarel.
- c. Marie ek so ser ti pas balye dan zot lasam.
- d. Bann seval pe rant dan lekiri.
- e. Lindi pase, Misie Lam ti donn boukou devwar.

11. Indik letan bann verb ki finn souligne.

Exanp:

Julien pou vini demin.

pou vini - fitir

- a. Yer, Sylvie <u>ti koud</u> enn rob.
- b. Apre klas, nou pou al dan libreri.
- c. Priscilla <u>finn manz</u> enn kantite goyav.
- d. Kot to ti ete yer?
- e. Taler granper <u>pou rakont</u> mwa so metie.



12. Met bann verb dan braket dan letan ki bizin.

Exanp	o:
Dan tr	wa mwa, mo lafami Singapour. (vizite)
Dan tr	wa mwa, mo lafami <u>pou vizit</u> Singapour.
c. d.	Toulezour papa trant minit lexersis avan li al travay. (fer) Nou sinema apre demin. (ale) Yer Ketsia lido avek so papa. (zwe) Toulezour mo enn yaourt apre mo dezene. (manze) Dan sa rezion-la, souvan lapli dan gramatin. (tonbe)
13. So	oulign marker preverbal dan sak fraz.
Exanp):
Zour fe	et lamizik, Alain ti zwe laflit.
Zour fe	et lamizik, Alain <u>ti</u> zwe laflit.
c. d.	Prosenn fwa, mo pou get bien avan mo traverse. Komie tan to pou kontinie koumsa ankor? Semenn dernie Tony ti aste enn frizider. "Plitar mo pou lav mo soulie foutborl," Rayan dir. Ki sann-la ti koup to seve?
14. Ek	rir marker preverbal ki bizin avan sak verb.
Lane p	prosenn mo al dan grad 7.
Lane p	prosenn mo pou al dan grad 7.
b.	Yer matant Roseline montre nou kouma repas linz. Dan de zour mo al mo randevou kot dantis. Lontan ena boukou saret bef dan Moris. Hans pe dir ki demin li sorti boner. Semenn avan, Didier galoup san met dan zourne sportif.
15. Ra	inpli bann tire avek enn indikater letan.
Exanp):
	mo pou al pisinn.
Demin	mo pou al pisinn.
a. b. c. d.	mo ti al Sesel dan konze lekol Pascal pe ekrir so konpozision. Mo kamarad pou vini Depi mo ti remarke ki so konportman pe sanze. mo ti aranz enn servolan.



16. Indike si verb souligne dan form long ou dan form kourt.

Exanp:

Toulezour mo tann Karen sante.

sante - verb form long

- a. Bato-la ti komande par kapitenn Bradbick.
- b. "Manz mwins disik!" dokter dir granper.
- c. Sa biter-la tap enn kout pie dan boul ek spektater krive Gorl!
- d. Fet ki mo ti pou ale finn anile akoz siklonn.
- e. To kapav <u>azout</u> enn tigit tiner dan lapintir-la?

17. Ranpli sak tire avek enn pronom personel.

LXaiij	o.
"Eski ₋	(Gregory) anvi lir to zistwar devan klas?" Mis Sonia demann Gregory.
"Eski ₋	to (Gregory) anvi lir to zistwar devan klas?" Mis Sonia demann Gregory.
a. b.	" (Bernard) masinn lor rodaz," Bernard dir. "Eski (misie Roland) rekonet sa dimounn-la?" lapolis demann misie Roland.
C.	Jessica ek Estelle finn sorti depi gramatin. Ziska ler (Jessica ek Estelle) pa ankor retourne.
d.	Depi gramatin (mo papa ek mwa) pe netway bann lafnet lakaz.
18. Ra	anpli sak tire avek enn pronom posesif.
Exan	p:
"Sa go	om-la ki pe fer dan to plimie? Pou (mo gom) sa!" Remy dir.
"Sa go	om-la ki pe fer dan to plimie? Poumwa (mo gom) sa!" Remy dir.
a. b. c. d.	Mo kaye pli prop ki pou (to kaye). Mo finn bliye mo lareg lakaz. To kapav pas mwa pou (to lareg). Kan li finn fini manz so gato banann, li finn pran pou (mo gato banann). Mo ena port tibia me mo pli kontan pou (Gilbert so port tibia).
19. 50	oulign bann azektif.
Exan	o:
Lucas	enn ti-baba amizan.
Lucas	enn ti-baba <u>amizan</u> .

Luana finn met enn rob rouz pou so laniverser.

Azordi Angelique finn reisi fer enn devwar difisil.

Melvin kontan lir bann zistwar komik.

Mo finn koup bann karot-la tro mins

a.

b.

c. d.



20. Ekrir enn azektif apropriye pou ranpli sak tire.

Exan	p:
Li pe (gagn enn douler zorey
Li pe (gagn enn douler zorey <u>insiportab</u> .
C.	Enn sat pe kriye kot lafnet.
21. Sc	oulign bann adverb.
Exan	p:
Rowa	n so papa travay ziska tar.
Rowa	n so papa travay ziska <u>tar</u> .
c. d.	Zame Vincent finn absan lekol. Li finn retourn vit parski so mama ti pe atann li. Tasiana kontan ramas boukou kokiyaz pou so koleksion. Get devan twa! Biento Mike pou vinn papa.
22. El	krir enn adverb apropriye pou ranpli sak tire.
Exan	p:
	mo al Plaine Champagne.
Sou	uvan mo al Plaine Champagne.
	Pe fer fre deor. Aret koz ! To dan enn lopital la. met lame dan nik mous zonn, to pou gagn pike. siklonn pas lor Madagaskar. Dokter Frederic rant dan so kabine konsiltasion
23. Sc	oulign bann determinan.
Exan	p: Bann zanfan pe al exkirsion Lindi.
<u>Bann</u>	zanfan pe al exkirsion Lindi.
a. b. c. d.	Jason dir ki li ti trouv enn misie pe travers baraz. Mang-la bien dou. Kontroler pe anpes bann dimounn pouse pou rant dan bis. "Kot to finn ramas lagazet-la?" papa demann mwa.



24. Indike si fraz-la sinp ou konplex.

Fraz	Sinp	Konplex
Yohann pe lav so bisiklet.	✓	
a. Julien finn aste enn termomet.		
b. Jeremie pe anvi al Plaine Champagne.		
c. Enn kanar blan pe naze dan larivier.		
d. Gaetan pe dir ki li finn trouv enn kato-ver dan so lakour.		
e. Depi koumansman lane, Darina finn lir mil paz dan sa gro liv-la.		

25. Ekrir sa bann diskour-la dan zot form indirek.

Exanp:

"Samdi mo pou al get fim Tarzan sinema," Joel dir.

Joel dir ki Samdi li pou al get fim Tarzan sinema.

- a. "Lontan ti ena boukou kamaron dan larivier," granmer dir.
- b. "To bizin fer inpe zefor" mama dir mwa.
- c. "Ouver zot liv paz 45," mis Sonia dir.
- d. "Pou ena gro lapli ek labriz sa Dimans-la," misie meteo pe dir.

26. Indike si verb ki finn souligne se enn verb santiman, verb aksion ou verb aksion mantal.

Exan	p:
Cyril p	pe pedal so bisiklet
Cyril p	pe pedal so bisikletverb aksion
a. b.	Mo frer ek so bann kamarad finn aranz enn kabann lor pie zamalak Jessica deteste manz bann gato ki ena boukou delwil
C.	Clara pe plore parski so sat finn perdi.
d.	Misie Eric panse ki dan lavenir pou ena gran loportinite travay dan sekter maritim
e.	Didier ankor pe kalkile kouma pou travay sa kestion-la.

Evaluation/ LORTOGRAF



1. Ekrir sak sif an mo.

0 -	zero	_	
a.	1 -	f.	521 -
b.	3 -	 g.	1001 -
C.	100	h.	2020 -
d.	105	i.	4050
e.	210 -	j.	10 521 -

2. Antour bann mo ki ena son [õ].

molton	kone	rezone
savonet	savon	limon

3. Antour bann mo ki ena son [ã].

lanti	vane	kondane
komannman	koloran	manet

4. Antour bann mo ki ena son [ε̃]

malin	minit	linite
rondin	morisien	dipin

5. Ekrir ler ki finn indike an mo.

5.00 p	o.m - sink-er tanto		
a.	10.10 a.m	e.	8.30 a.m
b.	3.15 p.m	f.	7.20 p.m
C.	2.20 a.m	g.	1.17 p.m
d.	11.15 a.m	h.	3.25 a.m

6. Kol bann silab ansam pou trouv 10 mo.

van	ro	man	lin					
san	ti	le	di					
mon	te	la	ter					
Exanp: _van	Exanp: _van ti la ter vantilater							
a b c d			f g h i					
e	 		J					



7. Ekrir nom sak desin.















8. Re-ekrir bann mo ki finn souligne san fot.

Enn aswar konper Yev pe <u>sot</u> sote (sot-sote). Malsans dan li, li pa	finn remarque
() enn pwi akote pie mang. Konper Yev rat <u>targuet</u> (_) ek li tom dan
pwi-la. Li fer tou so posib pou li sorti, me malerezman li pa reisi trouv enn lizc	our. Alor li pena
oken () swa ki res labamem ek atann kikenn vini.	
Landemin konper Kabri pe <u>pass</u> () par la. Li zet enn ley dan () konper Yev pe asize.	ı pwi ek li <u>truv</u>
"Ki to <u>pe</u> fair () anba?" konper Kabri demande.	
"Mo finn desann pou bwar delo. Vinn goute, sa delo ki gagner (_) isi-la, enn lot



9. Soulign sink fot dan sa text-la ek koriz zot.

San panse, konper Kabri sot dans pwi.

"Delo-la fre. Mo ti byen bizin bwar sa delo-la. Anplis pe fer extra so," konper Kabri dir.

Apre ki konper Kabri finn bien bwar delo, li met lor porte pou sorti, me li pa capav.

"Mo ena enn lide. Met to de lapat lao, mo mant lor twa ek mo sot deor. Apre mo pou al rod led," konper Yev propoze.

Konper Kabri dakor ek kouma konper Yev sorti, li al rod led san tarde.

Dan enn trantainn minit, enn group zanimo finn reini kot sa pwi-la. Sakenn pe donn enn lide kouma pou tir konper kabri. Enn group zako nek kriye, "Kouma zot kone, nou bann zako, nou bien azil. Les nou fer travail-la."

Dan enn batman lizie, sa group zako la desann dan pwi. Lame dan lame, zot pran konper Kabri zot monte.

Depi sa zour-la kan enn zanimo tase dan pwi, bann Zako vinn ede.

10. Reper bann fot ponktiasion ek koriz zot.

Exanp: kouma to apele.

Kouma to apele?

- a. ouver sa lafnet-la?
- b. Sak samdi mo ekrir enn zistwar dan mo kaye.
- c. Ayo, sa kankre-la pe anvol lor nou?
- d. Kiler to pe al vizit tantinn Kamla!
- e. Jemima ek albert pe al belzik an Desam avek zot paran.

11. Ekrir sign ponktiasion ki manke dan sak bwat.

Dan landrwa ☐ tou dimounn kone ki matant Zann enn dokter latizann ☐ Avan li ☐ so mama
ek so granmer ti dokter latizann□ Dan zot laservel□ zot inn rezerv boukou sekre pu mel-
anz feyaz ☐ fler ☐ lapoud dibwa avek rasinn pou fer medsinn ☐

Enn extre Komeraz dan vilaz (2012), Jan Maingard.

12. Reper bann erer lozik ek koriz zot.

Exanp:

Lindley met so soulie. Apre li met so soset.

Lindley met so soset. Apre li met so soulie.

- a. Mo kontan bwar dite dou. Met enn kouyer disel anplis pou mwa.
- b. Ena zi dan tempo, vid dan enn ver pou to bwar.
- c. Met sa delo-la dan masinn-a-lave pou li glase.
- d. Donn mwa enn kilo delo avek ou.
- e. Sak Samdi, Steward galoup sink kilogram.



- f. Pe fer tro nwar, alim enn vantilater.
- g. Mo tonton so ledan pe fermal. Li finn al get enn kardiolog.
- h. Dan radio finn dir ki pou ena gro vag dan larivier akoz move letan.
- i. Amenn enn diksioner, mo ena pou rod nimero telefonn lopital.

13. Met lespas pou separ bann mo.

Motipaskotstadyer.

Mo ti pas kot stad yer.

- a. Reponnsabannkestion-la.
- b. Richardfinnperdiboukoularzandanlekours.
- c. Ennlanwitlaplifinntonbe.
- d. Mopafinnkontannanye.
- e. Motrofatigepoukontinie.

14. Met lespas ki bizin ant bann mo pou fer enn fraz. Fer atansion zot lortograf.

Re touRn dAnto pLas.

Retourn dan to plas.

- a. Non, b isS aint-P ier rep ank orp ase.
- b. B er nAr dpE vi Nn ave kso fr Er.
- c. Lo rNa per Od IEs ka liE.
- d. Ma mA peK wi Rot id An lak Wi ziNn.
- e. A nDes amM op ou alL eS pAgn.

15. Anserkle bon repons.

taksi (taxi

montagn montayn

nasional nasyonal

exanp egzanp

axelerater akselerater

sanpiyon sanpignon

larenion lareyon

Evaliation/ LEKRITIR



1. Met bann mo an-ord pou form bann fraz.

Exanp:

lexersis - toulezour - minit - fer - bizin - trant

Bizin fer trant minit lexersis toulezour.

- a. avek kamarad Gina koz so pe
- b. lasoup enn pe kwizinie prepar
- c. pran lapli so tonbe Mireille parapli parski pe
- d. finn expozision Samuel so vizit mama al ek enn

2. Met bann mo an-ord pou form bann fraz.

Exanp:

niaz - soley - bann - gro - kasiet - pe

Bann gro niaz pe kasiet soley.

- a. zorey tapaz li Sak tann mo dres enn fwa sat so
- b. fet laniverser Samdi Mirella prosen sinkiem so pou
- c. granmer zi prepar Mo enn pou pe mo
- d. kamarad Biento mo demenaze meyer pou
- e. desid mama ofer pou Miko enn Mikaela bouke ek zot

3. Mo met bann fraz an-ord pou form enn ti zistwar.

- Li melanz lafarinn, delo, disel ek levir pou fer enn lapat.
- Misie Tony, enn boulanze, koumans travay bien boner toule gramatin.
- Apre swasant minit, dipin vinn dore ek kroustiyan.
- Kan lapat finn bien petri ek repoze, li met li dan four.



4. Mo koumans par seki an italik e re-ekrir bann lalinn an-ord pou form enn zistwar.

Zis avan lete, li prepar terin kot li pou plant tou kalite legim.
Mo granmer kontan ed li pou aroz
Li kone ki bann legim fre
kiltiv so potaze.
Depi bien lontan, mo granper
bien bon pou lasante.
bann tomat ki bizin boukou delo.
avek tou zot vwazinaz.
Apre sak rekolt, zot partaz zot legim

5. Lir sa poster-la ek ekrir enn e-mail pou inskrir twa.

Dan e-mail-la, donn to nom, laz, ladres, lekol ki to frekante, tem ki to finn swazir ek dir ki finn ankouraz twa pou partisipe.

KLIB ATHENA

KONKOUR DESIN EK LAPINTIR



Klib Athena pe organiz enn konkour desin lor tem

"Gard nou pei prop"

Dat: 26 Mars 2017 Ler: 09 00 – 12 00

Plas: Gran lasal Klib Athena

Enn konkour pou zelev **Grad 5 ek Grad 6.**

Zot pou bizin desinn swa:

Plizier pri interesan

• Enn larivier prop

1. Enn vwayaz Rodrig

• Enn lakour lekol bien prop

2. Enn set liv

Enn laplaz prop

3. Enn diksioner

Bann zelev interese bizin avoy enn e-mail klibathena@gmail.com avan 20.03.17



6. Ekrir enn fraz avek sak group mo.

- a. magazin linz fet
- b. perdi sak bis
- c. dantis rase douler
- d. konze kamarad sinema
- e. veteriner lisien pikir

7. Swazir 1 fraz dan seki finn donn twa e servi li pou koumans enn zistwar dan anviron 100 mo.

- 1. Daren koumans plore kan so kamarad anons li so demenazman.
- 2. Mo bann kouzin ti pe zwe dan karo kann kan zot tann enn son bizar deryer zot.
- 3. Madam Rita ti invit tou so bann vwazin pou fet Divali kot li.
- 4. Lane pase, Fiona ti dekouver enn lakav pre kot montagn Lion.
- 5. Dina ek Reena, de zimel idantik, kontan takinn tou dimounn.

8. Kontign sa zistwar-la. Ekrir anviron 100 mo.

Enn gramatin, mo mama ti pe koup laviann dan lakwizinn. Li ti pe servi enn gro kouto bien fite. Li pe prese pou prepar dezene. Mo papa ti fini al travay. Mo ser ek mwa ti pe get ti-komik pandan ki mo granmer ti pe lir so lagazet.

Enn kout, nou tann enn gran tapaz koumadir enn zafer finn tom lor marb dan lakwizinn.

9. Servi bann mo ou group mo ki finn done pou ekrir enn zistwar anviron 100 mo.

```
lakaz abandone – vit kase – move leta
atire par enn tapaz – bann voler – par lafnet
telefonn – lapolis – rekonpans
```


10. To lekol ti organiz enn zourne sportif.

Servi kannva ki finn done pou dekrir sa zourne-la.

- preparasion maskot lekip
- stad diskour gradin
- atlet eprev partisipasion
- lanbians lazwa kontantman kriye
- trofe meday koup



11. Apartir sa zimaz-la, ekrir enn zistwar dan anviron 100 mo.





12. Ekrir enn zistwar dan anviron 100 mo apartir sa bann zimaz-la.









13. Servi sa bann kestion-la kouma gid pou ekrir enn zistwar dan anviron 100 mo.



- Kot misie-la pe deboute?
- Ki ena dan so lame?
- Dapre twa, ki li pe rod fer?



- Ki finn ariv misie-la?
- Kouma finn ariv sa dapre twa?
- Ki sann-la sa de garson-la?
- Kot zot sorti?



- Ki de garson-la fer?
- Ki reaksion misie-la?
- Eski misie-la finn blese?



- Ki zot pe atann?
- Ki bann zanfan-la pe fer?
- Kouma de garson-la finn santi zot?



14. Observ sa kat zimaz-la e ekrir enn zistwar dan anviron 100 mo.









15. Ekrir enn zistwar dan anviron 100 mo apartir sa foto-la. Servi bann kestion ki finn done kouma gid.



- Kot nou ete?
- Ki pe vande?
- Ki ena an aryer-plan?
- Ki misie-la pe fer?

Evaluation/ VOKABILER

Vokabilen

1. Met sa bann mo-la dan lord dan ki zot aparet dan diksioner.

Exanp:

kouper – mekanisien –aviater – zournalis – tourner

aviater – kouper – mekanisien – tourner – zournalis

- a. bate anferme favorize soude mansione
- b. lisien bouk ziraf kabri serpan
- c. zak frez zavoka pom zoranz
- d. kalson zip blouz rob- palto

2. Met sa bann mo-la dan lord dan ki zot aparet dan diksioner.

Exanp:

sware – soley – sime – senaryo – safari

<u>safari – senaryo – sime – soley – sware</u>

- a. letap lintestin labwet lwayote lour
- b. ditin deplezan danser domino drwat
- c. alerzi anplas akolad abitasion aspirater
- d. tipti tranzit twalet tanperatir textil

3. Met bann mo an-ord dapre diksioner.

Exanp:

ladig – ladverser – ladmirasion – ladres – ladwann

<u>ladiq – ladmirasion – ladres – ladverser – ladwann</u>

- a. istwar istorik isterik istorien istansil
- b. exampler exakteman exaltasion exaktitid exakteman
- c. bergamot ber berkay berne berze
- d. sanpion sanpagn sangliye santiman santralism

4. Relie sak mo avek so definision.

bizou • deversman delo depi enn oter

fennsing • enn tanpet ki extra violan

enn vit ki grosi bann kiksoz ki nou gete

loup • klotir metalik

ouragan • • enn obze ki dimounn mete pou fer zoli



5. Relie sak mo avek so kontrer.						
zanti •		• kourt				
vie •		• pre				
long •		• fre				
rapid •		• zenn				
so •		• move				
lwin •		• lant				
6. Forr	n bann koup	kontrer ave	k b	ann verb ki t	finn done.	
vande rantre mete aste	gagne	tengn perdi ferme akselere		desann		
Exanp	:					
	nde : a				:	
					:	
g	::		h.		<u>:</u>	
i	:		j	:		
7. Ran	plas sak mo a	an-gra par s	o k	ontrer.		
a. b.	Letan ti bien I Theo ek so no	•				
C.					extraordiner.	_
d. e.	Misie Darmer					
f.	• • • • • • • • • • • • • • • • • • • •					
8. Rod enn sinonim pou sak omonim ki finn souligne.						
 Thierry paret bien <u>abat</u> depi lamor so madam. Cindy finn pran zis trwa zour pou <u>abat</u> sa travay-la. 						
b.	 Bann dimounn nepli servi <u>drapo</u>, zot prefer kous. Lekol finn aster enn nouvo <u>drapo</u> pou lindepandans. 					
 Kevin bien mesanste, li kontan zwe bann tour tou dimounn. Li pou al fer enn tour deor kan li fini so travay. 						
d.	Mo ser pou fer so <u>resepsion</u> lotel. Bizin pas par <u>resepsion</u> pou gagn plis informasion.					



9. Fer enn fraz avek s	sak omonim.		
a. (i) reset:			
(ii) reset:			
b. (i) nef:			
(ii) nef:			
(ii) ver:			
10. Lir mo ki finn don	e dan gos apre sou	lign so sinonim.	
Exanp: avar	gourma	bizar	peng
verifie	cheke	desire	bouze
zournal	zistwar	liv	lagazet
akeyan	amikal	move	rankinie
ekonomize	gaspiye	garde	partaze
11. Trouv 2 sinonim բ	oou sak emosion ki	finn done.	
laper			
latristes			
lakoler			
lazwa			
12. Donn enn lot mo	ki ena mem sinifikas	sion pou sak mo ki fir	ın done.
a. salere	_ b.	exper	
c. andomaze	d.	iletre	
d. tanpet	e.	portan	
13. Relie bann mo po		inonim.	
adverser • flakon •	• k	ontinie ikan	

• fiol

• rival

• deteste

kontan

zaret arete

